

續
碑
傳
集



續碑傳集卷四

江陰繆荃孫纂錄

咸豐朝宰輔

杜文正公事略

李元度

本朝舊學諸臣若張文端勵文恪徐文定顧文端嵇文敏福文端朱文端蔡文勤朱文正汪文端諸公皆以論思典學啟沃

聖聰其裨益於

主德者至深且久越

文宗朝則太師大學士杜文正公爲最著稱公以咸豐二年七月九日薨於淮安清江浦行臺越二日馳聞

上諭曰協辦大學士杜受田秉躬端正勵節直清經術淵醇體用兼備

蒙

皇考特達之知由詞林視學山西

特召還朝入直上書房爲朕講習討論十餘年中日承啟迪獲益良多

嗣洊歷正卿忠勤益懋朕親政後加太子太傅以刑部尙書協辦大學

士每召見時於用人行政國計民生造膝敷陳深資匡弼前因豐工未

合江南山東兩省窮黎急需振卹特派前往查辦疊據馳報東南振務均已布置周妥念其觸暑遄征心力交瘁正切倦懷而前後奏牘中總未自陳病狀乃以感受暑溼遽至不起披覽遺章不覺聲淚俱下悲痛實深迴憶書齋景況如在目前奉使陞辭情尤眷戀方冀贊襄帷幄謠論常聞詎料相睽兩月晤對無期耶其賞給陀羅經被晉贈太師大學士入祀賢良祠卽照大學士例賜卹並給廣儲司銀五千兩治喪靈柩回京沿途地方官妥爲護送準其入城治喪屆時朕當親臨奠醑用申悲悃其父頭品頂戴前禮部侍郎杜壩年屆九旬猝聞此信定深悼痛其令恩華前往看視並賞給人棧十兩以資調養其子杜翰服闋後以庶子用孫三人均賞舉人用示朕愴懷舊學之至意未幾禮部以卹典奏請

予諡又

諭曰杜受田品端學粹正色立於朝皇考深加倚重特簡爲朕師傅憶在書齋朝夕納誨凡所陳說悉本唐虞三代聖聖相傳之旨實能發明蘊奧體用兼賅朕卽位後周咨時政利弊民生疾苦亦能盡心獻替啟沃良多嘉慶年間大學士朱珪仰蒙

皇祖仁宗睿皇帝鑒其品節特諡文正杜受田公忠正直揆諸諡法實足當正字而無愧其卽賜諡文正毋庸內閣擬請尋

賜祭葬如典禮其明年

駕臨辟雍講學追思往昔討論之功

特詔褒公品學復

命惇郡王卽家

賜祭一壇蓋公自道光十六年入直上書房及

文宗御極前後十有七年閒朝夕輔導未嘗一日或離

上側當奉使日入辭涕泣感動左右故公遺疏中感戀靡已念楚氛未

靖河患未平尤以敬天法祖勤政愛民崇節儉慎好惡平賞罰爲言

上聞震悼輟朝

手詔淋漓悲感柩抵京

命恭親王率侍衛十人往奠爵及

親臨賜奠

召見公父璫慰勞有加

特晉禮部尚書銜

命食全俸

恩禮優渥蓋非徒以禮崇師傅其君臣契合符揆有迥出尋常萬萬者

中外聞知爲公感泣亦非徒謂遭逢隆備誠以其時

文宗方嗣服百爲將起朝野皆延頸跂踵於

上之待公與公之所以輔翼

上者有無窮之望又且嶺嶠盜方熾承平久政事多隳廢左右臣僚或有隱微難喻及疏遠陳詞所不易白者獨恃公從容宣達於密勿之間而公年未篤老倚毗正未有艾顧不謂其猝然中道而遂已也公諱受田字芝農山東濱州人父壻嘉慶辛酉進士由編修官禮部侍郎致仕公生而篤謹敏學由天授踰冠舉嘉慶庚午鄉試道光癸未會試第一殿試二甲第一選庶吉士授編修癸巳大考翰詹擢中允

命督陝甘學政與陝西巡撫史譜姻親迴避調山西學政升洗馬

文宗就學奉

召還朝

命直上書房累遷庶子侍講侍讀學士至內閣學士兼禮部侍郎特命專心講授毋庸親閣務旋升工部左侍郎調戶部管三庫事歷左

都御史擢工部尚書累充

國史館提調協修官

日講起居注官

經筵講官道光戊子以編修校順天試壬辰充雲南副考官辛丑以工部侍郎爲會試副考官甲辰以左都御史典順天試丁未以工部尚書爲會試副考官辛亥以協辦大學士再典順天試所至得人中更大考翰詹及鄉會覆試朝考庶吉士散館均爲閱卷大臣復充上書房總師傅實錄館總裁專司

宣宗實錄彙本以刑部繁

復命管理禮部事務優之也公自侍經帷歲受

御書珍玩文綺之

賜道光丙午公六十生辰

賜御書福壽字暨諸珍物明年公父璫年八十有四頒

御書教忠篤慶額及福壽字如意文綺諸珍

賜之自後位日崇望日益重而公欲然不自滿假亦不好爲翹異平居敬慎所蒞事不煩擾而輒就理人望之如高山深林巨壑莫測其所蘊

蓄也少清貧隨宦京外躬佐理家政而劬學弗爲衰官京師退食猶日
親諸務公父致仕後就養京邸出入告面無少閒家庭雍穆於親舊閒
情意尤款篤母舅李壽春爲沁源令卒官鬻祭田以完民欠立以五百
金爲贖復之與人坦坦無疾言遽色顧中實嚴毅人莫敢以非義干遇
不韙屹不可奪在戶部時豫工籌餉推捐例者欲開墾附生援納教官
之條公獨爲一疏罷其議尤覽擇當世賢才爲

上進用會有

詔保舉人材公首薦林文忠則徐周文忠天爵其他大受小知名節較
然天下恆覩其效而

上尤眷念公所進引每歷試之推信不渝向忠武榮在粵軍時謗議沸
生幾蹈不測或言公實力陳輿論數保全之當粵寇初起公屢以粵事
詢粵人令條所聞見上之卽采錄入告公旣荷

上倚其造膝所敷陳有什伯千萬於此而潛謀默運於政本之地者語
悉外弗得聞卽其門人子弟欲於公之盛德大猷紀述一二亦終莫得
而擬議烏庠不有

明詔宣示特援朱文正公之例以崇錫令名又孰從而窺其底蘊哉公

薨年六十有五子翰道光甲辰進士由檢討累官工部侍郎軍機大臣
出嗣爲世父坊後翻乙未進士由編修官至兵部侍郎

書長白文文端公相業

許福成

聖清御宇餘二百年凡磊落閎偉蓋世之勲業皆出滿洲世族及蒙古
漢軍之隸旗籍者漢臣雖不乏賢儒不過以文學議論黼黻隆平而已
先皇措注之深意蓋謂疏戚相維近遠相馭之道當如此而風氣文弱
不嫻騎射將略非所長又其次也乾隆嘉慶閒防畛猶嚴如岳襄勤公
之服金川二楊侯之平教匪雖倚任專且久而受上賞爲元勲者必以
旗籍當之斯制所由來舊矣雖然人才視時勢爲轉移者也限於一格
則時棟不出用之無方則廣續不窮必有深識偉量者默燭先幾乃能
知窮變通久之道而斷然行之不疑此其幹旋氣運之功何可及耶長
白相國文端公文慶以咸豐初年爲大學士軍機大臣是時海內多故
粵寇縱橫經略大臣如賽尙阿訥爾經額兩使相皆以失律獲咎公嘗
言欲辦天下大事當重用漢人彼皆從田閒來知民疾苦熟諳情僞豈
若吾輩未出國門一步蒼然於大計者乎平時建白常密請破除滿漢
藩籬不拘資地以用人曾文正公起鄉兵擊賊爲壽陽祁文端公所貶

排又累戰失利公獨謂曾某負時望能殺賊終當建非常之功時時左右之胡文忠公以庚子江南科場失察與公同鑄秩公嘗與胡公語奇其才略由貴州道員一歲閒擢巡撫湖北所請無不從者公實從中主之當是時袁端敏公甲三督師淮上駱文忠公秉章巡撫湖南公嘗薦其才請勿他調以觀厥成其兼筦戶部也今相國朝邑閭公方爲主事明習部務公常采用其議雖他司所掌亦詢之以定稿鄭親王端華侍衛肅順漸進用事然獨嚴憚公公累世貴顯氣度渾融能斷大事爲八旗王公所敬信端華肅順雖頗被裁抑弗敢怨也及公將薨遺疏謂各省督撫如慶端福濟崇恩瑛榮等皆難勝任不早罷之恐誤封疆事其後數人皆如公所料而

廟謨亦頗循公成畫未及數年曾李左諸公聯翩大用遂以削平羣寇曾公克金陵報捷也推使相官文恭公居首而已次之海內稱其讓德今伯相李公將平捻寇將軍都興阿公甫受

命督師而寇適滅都公謙不報捷大功之成由漢大臣專報自茲役始迨左文襄公平回寇則竟不參以他帥滿漢已無町畦功名之路大開賢才奮而

國勢張蓋文文端公之力爲多夫宰相以薦賢爲職薦一世之賢平一世之難其功固不淺若所薦不僅一世之賢而移數百年積重之風氣非具不世出之深識偉量其孰能之余故表而書之以謂中興之先論相業者必以公爲首焉

贈太子太保武英殿大學士華陽卓公神道碑銘

馮桂芬

稽古唐虞股肱耳目策之以翼爲明聽申之以予違汝弼曷嘗有宰相諫官之分秦漢御史大夫爲宰相階猶爲近古唐宋而後臺省始截然爲二甚則水火顧或起家諫垣累階政府類能詳明憲令閑練程品執法無屈撓

國朝自御史爲大學士者七人武定李文襄臨桂陳文恭功名尤著道光咸豐間則推華陽文端卓公公諱秉恬字靜遠號海帆先世廣東嘉應州人曾祖諱上雋遷安岳縣又遷四川之華陽遂占籍焉曾祖妣周祖諱德秀妣謝考諱廷璋妣王三世皆以公官

誥贈光祿大夫妣皆一品夫人廷璋公六子公其長也年十有九游庠其明年登賢書聯捷成進士選庶吉士授檢討丁母憂服除改山東道監察御史升吏科給事中巡東漕轉工科掌印給事中巡中城擢鴻臚

寺少卿順天府府丞調奉天丁父憂服除授太僕寺少卿歷遷大理寺少卿太僕寺卿太常寺卿宗人府府丞內閣學士禮部左右侍郎吏部左侍郎都察院左都御史兼管順天府尹兵部戶部吏部尚書三署兵部尚書以吏部尚書協辦大學士拜

文淵閣大學士晉

武英殿大學士管兵部調管戶部三庫又調戶部工部

賞戴花翎六旬

賜壽

紫禁城騎馬咸豐五年九月三日疾薨邸第遺疏上

天子轎悼

遣官致奠

贈太子太保

賜祭葬

予諡文端

賞景濂景洵舉人先後典會試一典江南陝西試各一視學奉天浙江各一典武會試一監臨武闈一

殿廷試讀卷閱卷以十數

上謁

陵留京辦事者七隨扈

慕陵讞獄陝西者各一充

高宗實錄館分校

國史館正總裁

玉牒館副總裁稽察欽奉

上諭事件處

文淵閣直閣事稽查宗學東四旗覺羅學公性孝友待諸弟若一與人
交義以誠爲學有體有用所條列規畫皆可見諸施行巡東漕時謂東
省廂河以疏濬泉源爲第一義親履泰安兗州諸境得四十三處命名
勒石至於今無廢其查宗學也疏言月課人少有名無實蓋以無獎勵
之故請將連列優等者記檔序補副管闕

廷議從之宗學文風爲之丕變又疏陳川陝楚三省老林事自陝西之
略陽迤東至湖北之鄖西曰南山老林自陝西之甯羌迤南而東貫四
川境至湖北之保康曰巴山老林縱橫千餘里遼闊而磽瘠疊嶂重巒

深林密箐厥種三品苞穀蕎豆燕麥三省無業游民出錢數百賃種一
薄一嶺僑居其中遷徙無定蹤謂之棚民屯聚既多良莠莫辨攘奪矯
虔所在多有遇凶饑一二奸民爲之倡蟻附蜂起三省地方官輒以華
離交錯互相隱諱釀成大案莫職其咎請專設一監司治之議下督撫
雖不果行而三省皆派員守邊云公當官執憲抨彈無所避入西臺首
劾南陽府辦振不善事又劾臨清軍營保員過濫知府金潮趙對墀以
營私獲咎不宜捐復膺方面又奏大名滄州衛輝青州東昌武定徐州
各屬官取財於捕役捕役取財於盜賊謂之月規是官取盜賊之財也
請嚴禁

仁廟皆韙之陝西革生徐登元以知縣王以銘侵帑冒振狀於

朝公以宗丞偕侍郎恩特亨額公奉

命往訊復言以銘捐修隄工輒以甫築復衝所糜之銀牽合冊報轉
得議敘又失察鄉約購藤木索鋪戶錢皆不合而偷減城工事不實請
褫以銘職而坐登元以誣兼京兆一職號難治公初以左都御史蒞事
迄於大拜凡十八年先後居是職無如公久者不動聲色羣吏肅然百度
具舉無纖毫過差人以爲難往時九卿會議一二王公樞相主之以下

率占位畫諾惟謹公在列必侃侃正辭知無不言言無不盡於是

國家承平既久蘗芽萌伏而恬熙無改朝列以雍容揄揚爲職雖名御史得卿寺卽噤口爲六曹長貳無建言者公由科道游登揆席封事無虛月往往危言悚論不爲用事者所喜而始終無易行蓋鯁直敢言其天性也

聖主亦知公深恩禮不少衰公工詩古文有集若干卷藏於家門下士屢請刊行不許尤長奏議輒焚其稿雖家人子弟不之見故不傳精於衡鑒乙未南闈爲名榜今詹事殷公兆鏞其尤也愛士尤摯駐防壽生昌亦乙未榜考据詞章儕輩罕儔匹未弱冠登賢書無何駐防停文試幾於禁錮桂芬主江甯講席奇之抵京言於公慨然代輸金得筆帖式援駐防京官子弟例與試遂中式入翰林其成就後進多此類公生乾隆四十七年四月二十四日壽七十有四崛起田閒弱齡通籍厯事三朝垂六十年功建名立生榮死哀可謂全德元配張夫人生於乾隆四十三年十月十七日年二十三于歸卒於嘉慶十九年四月二十日年三十七生子楨殤檣庚子進士翰林編修厯官吏部右侍郎女一殤繼配何夫人以乾隆五十四年五月四日生道光十二年閏九月六日

卒年四十四歸於公凡十五年側室褚宜人生椿正一品廕生刑部員外郎女二一殤孫九景澄山東候補道

賞戴花翎景濂丙辰進士吏部主事

王牒館議敘候升員外郎景洵

欽賜舉人

國史館謄錄景沅候選縣丞景涵兵部員外郎景瀛國學生景淮景洙景汶孫女一曾孫二煦然曾孫女四咸豐五年十月二十五日標等奉公殯葬於直隸昌平州黃土村聚福莊之原以兩夫人祔禮也桂芬以考取教習出公門下又與公子少宰標同年公之葬也少宰寓狀吳門以隧道之文相屬狀過略馳書求其詳未覆而少宰病卒逾三年桂芬人都公孫景澄等述先志又以請桂芬尋以疾歸又逾年始得爲公銘

銘曰

南陽褒德中興輔翼冠冕東京越二千年續復前賢惟公繼聲并維岷絡會昌建福蔚爲秀靈遂甯開先公實比肩瑞我

聖清爰在觸歲嶄然早慧露爽英英鵬起扶搖鸞翔慶霄一舉蓬瀛人中屈軼相百相十榻坐獨橫華蟲七章槐棘兩行述簡升庭偉姿閎議

敏心強志大猷是經封符指期赫赫熙熙枹鼓稀鳴

聖明嘉獎洊陟師長金甌覆名貞厥素履以翊

天子羽儀承平世習渙忍依違廉謹公獨錚錚矯然不阿坦然不頗砥柱崢嶸安危密疏遠謨長慮敷納詳明弼亮

三朝不磷不彫老成典型宜躋遐紀修塗遽已

九重悼驚宰樹藹春崇岡鬱雲護此佳城生維依

日殉猶戀

闕慰公丹誠刻飾龍螭發揚聲詩萬古永貞

祁文端公神道碑銘

并序

秦細業

故大學士壽陽祁文端公之薨爲同治五年秋九月後二年夏四月旣歸葬公於某鄉某原距今又數年矣而神道之碑未立公子世長以屬之無錫秦細業細業束髮受書卽聞公名迨道光丙午副順天榜幸出公門下然先後僅一再見侍公日淺知公亦未深八年冬復來京師世長以所爲墓志及公自訂年譜見示趙編修曾向並語公逸事甚詳曾向亦公丙午所取士而尤習於公子者也於是始知公厯事四朝久參密勿侃侃持正論不少阿附取容同列多忌之若非

天子察其忠誠不爲所媒孽而中傷者幾希矣故公雖躋極品被恩遇意常邑邑若不釋然卒以憂危成病屢進屢退以迄於終弗獲大信其志夫乃歎位高祿厚庸俗之所誇耀者固不足爲公道卽僅僅以文學政事相推者亦未有以識公之心而闕公之蘊也惟公門生故吏滿天下豈無蓄道德能文章其人者若紳業之無狀行能淺薄學識卑陋方懼負公一日之知又曷以銘公哉且既有王通政拯表墓之文矣母乃重出何旣遜謝再三而世長復述公不願得尊官貴人志墓之意且言行事未備體例各殊敢涕泣以請乃不克辭又遲之三載始爲之序而銘焉非敢緩也蓋其慎也公壽陽祁氏諱窩藻字叔穎又字淳甫以敬避

御名改字實甫自號曰春圃學者稱春圃先生曾祖諱雲瑞縣學生祖諱文汪長治縣教諭父諱韻士由中允改官至戶部郎中三代皆

贈光祿大夫母氏弓氏劉皆

贈一品夫人公父有丈夫子六公次居五劉太夫人出也公幼而岐嶷性至孝年十二父以事繫刑部獄公隨侍讀書不少輟並賦春草詩以見志越歲事白遣戍伊犁公請從行不許乃奉母返里益篤苦於學年